

聖諭像解

聖諭像解卷之十二目錄

聖諭第八條

講法律以儆愚頑

約法三章

除去肉刑

更定箠令

觀明堂圖

不孝當誅

鞭婦至死

子從父令

絕不爲親

奪田還弟

治奴告主

斷配黥僕

治不起子

聖諭像解卷之十二

江南太平府繁昌縣知縣加一級臣梁延年編輯

聖諭第八條

講法律以儆愚頑

此一條是

皇上刑期無刑。欲汝等百姓。通曉法意。深究律理。知所趨避。以自處於無過之地也。律之爲書。至詳且密。爲上者。旣難家到而戶說。爲民者。豈能徧讀而周知。然

古有讀法之制。有懸象之典。所以啓廼齊民。使知懷刑而不敢犯。提撕警覺。不啻三令五申焉。彼蚩蚩蠢蠢者。入諸耳而惕諸心。儼如刀鋸在前。鼎鑊在後。雖欲不吞刀割腸。飲灰洗胃。舍其舊而新是謀。何可得也。律載百工技藝諸色人等。有能熟讀講解。通曉律意者。若犯過失。及因人連累致罪。不問輕重。並免一次。蓋群瞽同行。有一明目者。爲之先導。則指示在前。必不至於墮坑墜塹。若以盲引盲。幾何而不載胥及溺也。是故明目者。通曉律意者也。群瞽者。愚頑者也。有一通曉律意者。而爲群瞽熟讀講解焉。如一燈然。

而千巖不夜。一鍾振而萬類咸聞。此

聖天子立有過失連累。並免一次之條。誠欲其有所慕而爲之。有所畏而不爲之也。

皇上好生之德。欽恤之仁。如天地父母而於愚頑之衆。猶不能不厪

聖懷者。蓋七子均養之慈。亦萬植同滋之德也。復何論於智愚秀頑之分哉。汝等百姓。其將何以仰答

高厚也乎。


約法三章



漢高祖初入咸陽。爲三章之約。與天下更始。曰。父母苦秦苛法久矣。誹謗者族。偶語者棄市。吾當王關中。與父老約法三章耳。殺人者死。傷人及盜抵罪。餘悉除去秦法。民大悅。

此一幅像。是寫漢高祖初定天下。能以不嗜殺人者樹四百年之鴻基也。漢高祖初入咸陽。卽爲三章之約。示與天下更始。曰。若輩父老。苦秦暴虐之法久矣。迹涉誹謗者。卽滅其宗族。兩人偶語者。卽擬以大辟草菅民命。深可哀憫。今吾先入關。當王關中。與若輩父老約誓。止立法三章耳。殺人者。當以大辟。其闕毆

傷人及盜人財物。俱抵以應得之罪。諸餘嚴刑峻法。皆悉除去。秦民大悅。按國祚之延促。政之仁暴分之也。秦民苦秦苛法。狼顧脅息。如坐湯火。高祖一入關。卽與洗除之。開國規模。自是不同。且其約法三章。炳若日月之經天。有目者皆見。赫若雷霆之震物。有耳者皆聞。至簡而易知。至顯而易避。踈節濶目。不待講明。而愚頑知儆。此民所以重犯法也。厥後鄼侯踵事加詳。悉皆權輿於是。貽謀孔懿。傳祚無疆。有以也夫。



除去肉刑



漢文帝五年。齊太倉令淳于意。有罪當刑。逮詔獄。繫長安。意無男。獨有五女子。行會逮。罵其女曰。生子不生男。緩急非有益也。其少女緹縈。自傷悲泣。廼隨其父至長安。上書曰。妾父爲吏。齊中皆稱其廉平。今坐法當刑。妾傷夫死。不可復生。刑者不可復屬。雖欲改過自新。其道亡繇也。妾願沒入爲官婢。以贖父刑罪。使得自新。書奏。天子憐悲其意。遂下令曰。制詔御史。蓋聞有虞氏之時。晝衣冠。異章服。以爲戮。而民弗犯。何治之至也。今法有肉刑三。而姦不止。其咎安在。非乃朕德之薄。而教不明與。吾甚自愧。故夫訓道不純。而愚民陷焉。詩曰。愷悌。

君子民之父母。今人有過。教未施而刑已加焉。或欲改行爲善。而道已繇至。朕甚憐之。夫刑至斷肢體。刻肌膚。終身不息。何刑之痛而不得也。豈稱爲民父母之意哉。其除肉刑。有以易之。

此一幅像。是寫緹縈願以身贖父罪。文帝憐其意。遂除肉刑。保全千萬世生民。身體肌膚。德至厚也。漢文帝卽位之五年。齊太倉令淳于意犯罪。當問刑。逮捕詔獄。傳繫長安。意未生有男兒。止有五女。臨逮時。罵其女曰。生子不生男。卽有緩急。何能相救。真無益也。其少女名緹縈者。聞父言自傷。且悲且泣。廼隨侍其

父至長安。親伏闕上書曰。妾父爲吏。齊國中。人皆稱其廉潔平允。今坐法當刑。安所逃罪。然妾傷夫死。者不可復生。刑者不可復屬。雖有改過自新之意。其道何繇而至。妾願以身沒入官家爲婢。以贖父刑罪。使從此得以自新。書奏。天子憐悲其孝意。遂下令曰。制詔御史。朕聞有虞氏時。諸犯罪者。止圖畫其衣冠。殊異其章服。以爲戮辱。而民耻犯法。治道抑何至也。今法有黜劓。斬趾。肉刑三條。而姦邪不止。其失安在。豈朕德薄教不明所致與。朕甚自愧。訓下之道不絕。使民罹於罪網。詩云。愷悌君子。民之父母者。蓋言愷以

強教之。憐以悅安之也。今百姓有過。教未施而刑已加。或欲改行爲善。其道亾繇。誠如淳于意少女緹縈所言。故朕甚憐之。夫刑至斷人支體。刻人肌膚。終身不復生息。又何其痛而不德也。豈稱爲民父母之意哉。其議除肉刑。今所以易之者。按肉刑之設。其來已久。文帝仁心爲質。感於緹縈女子之一言。卽除而去之。使天下萬世不復受斷割剝剔之慘。其深仁厚愛。蓋淪於肌膚。浹於骨髓矣。汝等繁昌百姓。盡謂生女無益。及長而嫁人。又復有奩儀之費。故一產女孩。卽淹而殺之。間有舉養一二者。至於三。至於四五。則斷

無鞠育之事矣。今觀淳于意之轉危爲安。轉禍爲福。全賴少女緹縈之力。然則緩急有益。固無分於男女。彼獲女而繫之多女。而益繫之者。倘有緹縈生其間。是自棄其身家性命也。不謂閨中弱質。乃有澤及萬世之功。汝等百姓。誠留心於此。雖有十女。猶當撫而活焉。至於從儉嫁遣。語具戴良事中。尤不必過爲慮也。